

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- जम्मू-कश्मीर पुलसा दे डरैक्टर जनरल नलिन प्रभात होरें आखेआ ऐ जे उंदा बल उसलै तोहड़ी अराम नेई करोग जिसलै तोहड़ी आतंकवाद दा समूलचा नास नेई करी दित्ता जंदा। कठुआ टाक्करे च 2 पाकिस्तानी आतंकवादी मारे गे ते 4 पुलसकर्मी शहीद। शहीद जवानें गी जंदे रोज श्रद्धांजलि अर्पत कीती गई।
- उपमुख्यमंत्री सुरिंदर चौधरी होरें जीएमसी जम्मू दा दौरा लाइयै कठुआ टाक्करे च जख्मीं होए दे जवानें दी डोल पुच्छी।
- उपमुख्यमंत्री होरें आखेआ ऐ जे सरकार औद्योगिक तंत्र दे विकास लेई वचनबद्ध ऐ।
- मंत्री सतीश शर्मा होरें आखेआ ऐ जे जम्मू-कश्मीर, भारत दे सैलसफा दे मुकुट रत्न दे रूपै च अपनी पन्छान फही पक्की करा'रदा ऐ।
- एशियाई कुश्ती चैंपियनशिप-2025 च भारती पलोआन मनीषा भंवाला होरें देसै लेई सुन्ने दा पैह्ला तगमा जित्तेआ ऐ।

<><><><><><>

Kathua DGP

कठुआ जिले दे राजबाग इलाके च जारी टाक्करे दरान इक होर पुलसकर्मी दा शव बरामद कीते जाने दे चलदे, शहीद होने आहले पुलसर्मिएं दी गिनतरी बधियै 4 होई गई ऐ। आकाशवाणी दे जम्मू संवाददाता दी रिपोर्ट मूजब, शहीद होए दे चौथे पुलसकर्मी दे शव बारै, जंदे रोज, ड्रोन दी मदाद कन्नै जानकारी हासल होई। जम्मू-कश्मीर पुलसा दे डरैक्टर जनरल नलिन प्रभात होरें दस्सेआ ऐ जे जैशे-मोहम्मद गुट दे द'ऊं आतंकवादी, जंदे वीरवारें होए दे टाक्करे दरान मारे गे हे। शक्क ऐ जे एह आतंकवादी पाकिस्तान दे बसनीक न। ऊ'आं शुरुआती तौर उप्पर जेहड़े होर द'ऊं आतंकवादिएं दे मारे जाने दी गल्ल आखी जा'रदी ही, उं'दे शव अजें बरामद नेई कीते जाई सके न। डीजीपी होरें आखेआ जे पुलस बल उसलै तोहड़ी अराम नेई करग जिसलै तोहड़ी आतंकवाद दा समूलचा नास नेई करी दित्ता जंदा। इस सरबंघै च मीडिया कन्नै गल्ल करदे होई डीजीपी नलिन प्रभात होरें आखेआ

<><><><><><>

Wreath Laying Ceremony

कठुआ जिले च आतंकवादिएं कन्नै होए दे टाक्करे दरान देसै लेई सर्वोच्च बलिदान देने आहले जम्मू-कश्मीर पुलस दे शहीद जवानें गी श्रद्धांजलि अर्पित कीती गई। जम्मू-कश्मीर पुलसा दे डरैक्टर जनरल नलिन प्रभात होरें दलेर जवानें गी श्रद्धांजलि भेंट करदे होई देसै लेई उंदे सर्वोच्च बलिदान गी नमन कीता।

<><><><><><>

Dy.CM-GMC

उपमुख्यमंत्री सुरिन्दर चौधरी होरें कठुआ टाकरे च जख्मी पुलसकर्मिएं दा पता लैने आस्तै जम्मू दे सरकारी मैडिकल कालेज अस्पताल दा दौरा कीता। उनें अस्पताल दे प्रशासनिक अधिकारिएं कन्नै मलाटी कीती ते उनेंगी जख्मी जवानें गी बेहतर शा बेहतर सेहत दिक्खभाल मुहैया करने दा निर्देश दित्ता। घायलें ते उंदे परोआरें कन्नै गल्लबात करदे होई उनें उनेंगी पूरे सरकारी मदाद दा भरोसा दोआया। उनें जोर देइयै आखेआ जे लोकें दी सुरक्षा ते सेहत सरकार आस्तै सब्बने शा उप्पर ऐ। उपमुख्यमंत्री होरें जम्मू कश्मीर च शांति ते सुरक्षा बनाई रखने दे प्रशासन दे संकल्प पर जोर दिंदे होई प्रभावत परोआरें कन्नै हमदर्दी बी प्रकट कीती।

<><><><><><>

Dy. CM-Industries

उपमुख्यमंत्री सुरिन्दर चौधरी होरें जम्मू कश्मीर च औद्योगिक इको-सिस्टम गी बढ़ावा देने दी सरकार दी वचनबद्धता पर जोर दित्ता ऐ। पी.एच.डी. चैंबर्स ऑफ कामर्स एंड इंडस्ट्री (पीएचडीसीसीआई) आस्सेआ भलेया लौहकी, लौहकी ते दरमयाने उद्यमें दे मैह्कमे आले मंत्रालय दे योगदान कन्नै बौद्धिक संपदा अधिकारें यानि (इंटैलेक्चुअल प्रापट्री राईट्स) बपार ते संवर्धन पर दुरुं दिनें दी कार्यशाला दे उद्घाटन दे मौके पर उपमुख्यमंत्री होरें औद्योगिक विकास गी वर्तमान सरकार दी सब्बने शा बड्डी प्राथमिकता दे रूपै च उजागर कीता। जम्मू च आयोजित कार्यशाला च स्थानीय उद्योगें आस्तै मददगार नीतिएं ते दखलअंदाजिएं दे राएं नवाचार गी बढ़ावा देने ते आर्थिक विकास गी बधाने पर ध्यान केन्द्रित कीता गेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” च इस बारी 30 मार्च गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग।

एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Satish Tourism

मंत्री सतीश शर्मा होरें आखेआ ऐ जे सैलसफा संस्कृतिएं गी जोड़ने आला इक पुल ऐ ते आर्थिक विकास दा इक प्रमुख चालक ऐ। उनें एह गल्ल इंडिया टुडे ट्यूरिसम अवार्डस-2025 च गुलमर्ग आस्तै एडिटर्स चाइस अवार्ड हासल करदे होई आखी। उनें जम्मू कश्मीर दे लुभावने परिदृश्य, समृद्ध विरासत ते गर्मजोशी कन्नै परौहनें दा सत्कार करने पर लोह पाई ते भारतीय सैलसफा दे मुकुट रत्न दे रूपै च एहदी स्थिति गी फही पक्का कीता। जंदे दो बरें च रिकार्ड सैलानिएं दे औने दे कन्नै सरकार बुनियादी ढांचे, पारिस्थितिकी-सैलसफा, रोमांच ते सांस्कृतिक सैलसफा पर ध्यान केन्द्रि करा दी ऐ। उनें निवेशकें गी साद्दा दित्ता ते जम्मू कश्मीर दे सैलसफा आले समर्थ गी इक कुल संसारी थाहर बनाने आस्तै केन्द्र दे समर्थन दा आग्रह कीता।

<><><><><><>

MWCD Bal Purskar

महिला ते बाल विकास मंत्रालय नै प्रधानमंत्री राष्ट्रीय बाल पुरस्कार लेई आवेदन मंगे न। आवेदक 11 अप्रैल थमां राष्ट्रीय पुरस्कार पोर्टल राएं आवेदन करी सकदे न। मंत्रालय नै इक ब्यान च आखेआ ऐ जे कोई बी बचा जेहड़ा भारत च रौहने आला भारतीय नागरिक ऐ ते जेहदी उमर 5 बरें ऐ ते 31 जुलाई 2025 तगर 19 बरें शा बद्ध उमरी दा नेई ऐ, ओह इनें पुरस्कारें लेई आवेदन भरी सकदा ऐ। मंत्रालय बहादुरी, खेड्ड, समाज सेवा, विज्ञान ते संस्कृति दे क्षेत्र च उपलब्धियां हासल करने आले बच्चे गी सम्मानत करने लेई हर बरें प्रधानमंत्री राष्ट्रीय बाल पुरस्कार दा आयोजन करदा ऐ। ऑनलाइन आवेदन करने दी खीरी तरीक 31 जुलाई रखी गेदी ऐ।

<><><><><><>

Sericulture Ramabn

रामबन जिले दा रेशम उत्पादन मैहकमा रेशम दी राई-बाई गी बढ़ावा देने ते मकामी करसानें गी सशक्त बनाने आस्तै जागरूकता शिविरें दे राएं महत्वपूर्ण भूमका नभा करदा ऐ। समें-समें पर आयोजित इनें कैपें दा मकसद करसानें गी रेशम दे उन्नत किस्में दे कीड़े पालन तकनीकें दे सरकारी योजनाएं दे फायदे बारे च शिक्षित करना ऐ। रेशम दे कीड़े दी राई-बाई च अनुभव प्रदान करदे होई व्यावहारिक प्रदर्शन कीते जंदे न।

करसानें गी शहतूत दे बूहटे, लाजमी उपकरण किट ते होर केई लाजमी जानकारी बी दित्ती जंदी ऐ। मैहकमे दा मुख मकसद उच्च गुणवत्ता आले कोकून दे बधाना ते रेशम दे धागे दी आपूर्ति शृंखला गी मजबूत करना ऐ।

<><><><><><>

Udampur Mango Orchard

करसानें गी बाअख्तियार बनाने ते राई—बाई पैदावार गी बढ़ावा देने लेई सरकार आसेआ हर मुमकन मदाद उपलब्ध करोआई जा'रदी ऐ। सरकार दिएं बक्ख—बक्ख योजनाएं दे राहें करसानें गी लोड़चदे संसाधन उपलब्ध होआ'रदे न। एहदी इक बड्डी मिसाल उधमपुर जिले दे थलोरा ग्रां च अम्बें दा इक बाग ऐ जेहदी शुरुआत छड़े 100 दरख्तें कन्नै कीती गई ही ते हून इ'दी गिनतरी 235 तगर पुज्जी गेदी ऐ। जिला बागवानी विभाग आसेआ सरबंधत करसान गी एहदे लेई हर मुमकन स्थूलत दस्तयाब करोआई जा'रदी ऐ ते मेद ऐ जे इस रूतै दरान बी अम्बें दी बम्पर पैदावार कीती जाई सकोग। आकाशवाणी दे उधमपुर जिला संवाददाता नै सरबंधत करसानें कन्नै खास गल्लबात कीती। उ'नें आखेआ

<><><><><><>

Asia Wrestling

जॉर्डन दे अम्मान च एशियाई कुश्ती चैंपियनशिप—2025 च भारती पलोआन मनीषा भंवाला होरें सुन्ने दा तगमा जित्तेआ ऐ जिसलै के अंतिम पंधाल होरें कैह दा तगमा हासल कीता ऐ। महिलाएं दे 62 किलोग्राम भार वर्ग दे फाइनल च मनीषा नै कोरिया दी ओके जू किम गी 8—7 कन्नै हराया। 53 किलोग्राम भार वर्ग दे प्ले—ऑफ च कैह दे तगमे लेई खेड्ढदे होई अंतिम पंधाल नै ताइपे दी मेंग एच हिसएह गी तकनीकी म्हारथ दे दम उप्पर शिकस्त दित्ती। भारती पलोआनें हूनै तगर टूर्नामेंट च सुन्ने दा इक तगमा, चांदी दा बी इक तगमा ते कैह दे 6 तगमे जित्ते न। मर्दे दी फ्रीस्टाइल प्रतियोगिता अज्जै थमां शुरू होआ'रदी ऐ।

<><><><><><>